

欽定四庫全書

提要

心泉學詩稿六卷

臣等謹案心泉學詩稿六卷宋蒲壽宥撰壽宥之名不見於史其集亦不載於藝文志惟明文淵閣書目載有蒲心泉詩一部一冊檢永樂大典各韻內所錄頗多其間題名皆作壽宥而凌迪知萬姓統譜則作壽宥黃仲昭八閩通志又作壽晟互有同異今按永樂大典卷卷皆作宥字當非偶誤其作晟宥字者

集部四

別集類三 附錄



提要

殆傳寫訛也壽歲家本泉州其官履不概見
惟萬姓統譜稱其於咸淳七年知蒲州按蒲
州非南宋地而集中有梅陽壬申幼農偶成
書呈同官詩壬申為咸淳八年梅陽即梅州
今為廣東嘉應州地是壽歲實知梅州萬姓
統譜又載其在官儉約於民一毫無所取建
曾井汲水二竈置座右人頌曰曾氏井泉千
古冽蒲侯心事一般清是壽歲在當日為循
吏八閩通志則稱宋季益廣二王航海至泉
州守臣蒲壽庚距城不納皆出其兄壽歲陰
謀壽歲佯著黃冠野服入法石山下自稱處
士而密令壽庚納款於元既而壽庚以歸附
功授官平章富貴冠一時壽歲亦居甲第一
日二書生踵門獻詩有水聲禽語皆時事莫
道山翁總不知之句壽歲惶汗失措追之不
復見云云則壽歲又一狡黠之叛人稗官小
說記載多歧宋元二史皆無明文其孰偽孰
真無從考證今觀其詩頗有冲澹間遠之致
在宋元之際猶屬雅音哀錄存之釐為六卷
亦足以備一家若其人疑以傳疑姑附諸南



提要

宋之末馬乾隆四十六年四月恭校上

總纂官_臣紀昀_臣陸錫熊_臣孫士毅

總校官_臣陸費墀

心泉學詩稿卷一

賦

古賦二首

始余卜於斯丘兮倚白雲而為廬豈其有所使兮爰舍
吾之故居擷秋菊以為糧兮曰寒泉之與料無飢渴之
害己兮騁予駕其馬如朝飡氣於沆瀣兮夕撫景於望
舒瀉靈汞以為鏡兮結層冰而為壺流涓涓以不息兮
其原一而派殊念區區之抱甕兮決山水以為腴環碧
澗之方流兮知此樂之非魚落芳潔之潺湲兮漱瓊瑤

宋 蒲壽宥 撰

而飛珠噴玉布之珊珊兮謂未足以為娛走東國之截
嶠兮驅電駕而雷車始雌霓之連蜷兮忽河漢之飛趨
彼匡廬之雖大兮愧吾馬其已瘖語猿鶴以母怨兮盟
千載而弗渝

捫青霞之絕頂兮倚千仞而為高聞丹邱之有人兮期
萬里之與邀迨遐踪而不見兮悵靈物之難遭豈不同
乎穹壤抑有異乎山河東瞻衮濟西望岷峨隳輕風兮
可攝衣欲結兮薜蘿念故閣之燕麥悲荆棘之銅駝尔
乃託延陵之厚俗曰夷獠之同波苟聲教之可暨豈古
道之有他笑淳于之螳夢慨寧戚之牛歌昔子奇兮往
矣今鮑叔兮奈何豈無泉石可以婆娑問競日之夸父
與奔月之羿娥我欲從兮何所豈復怨兮蹉跎

瀑布泉賦

昔披榛而導泉愛其流之涓涓居焉而為清冷出之而
為潺湲跨蒼崖而直下瀉鳴瀑其如騫忽浣布於火日
俄飛帛於天門毋乃冰蚕之織得蛟室之所傳滌滄浪
澗虺虺隆隆或散如凌空之毳鶴或聚如飲澗之流虹
其光怪也如此欲想像其奚窮嘗聞呂梁之水懸三千
仞沫四十里龜鼉魚鼈不可游處被髮行歌或蹈於此
羅巖掛泉倒注崩砉石樓鐵橋迫不可即衡山三峯最

為竦桀噴薄橫飛匪漸而結今映青林日光玉潔自非
素朝翳莫能撤香爐竒秀實甲寰海傳之有三千尺賦
之今幾百載其自天而下也耿耿長河其赴壑而趨也
錚錚萬鎧納茲細流不知幾倍或曰香山草堂布水三
尺瀉階隅落渠石或垂練於終朝或鳴琴於永夕非其
狀之傳因其事之可撫於茲瀑也非曰千尋豈無匹素
使過昌黎必云振鷺舞風中之仙裳響松間之寶璐非
假力於人為果何心乎天雨予聞斯語斐焉而狂躍然
而悟頓消鄙吝之胃如餐沆瀣之露復何驚乎川涂粗
可娛乎朝暮苟猶誇彼之雄寧不失吾之故嗟夫其源
雖殊塗其流則同赴決合黎而西傾環崑崙而東注非
胼胝之聖功豈聲教之所暨利萬物而不爭如方圓之
隨器原上善之所稱本天一之初氣

和倪梅村梅花賦

昔湘纍之託諷兮顧何芳之不萃念草木之凋零兮貫
薜荔之落蔕嗟蘭艾之與處兮亦固知其蕪顛於梅枿
之偶缺兮非忿顧而疾視今靈山之獨立兮豈不類乎
江潭之憔悴忽繽紛於暮臘兮駭南雪之落地俾孤山
之美人兮得以樹夫高致彼桃李之暄妍兮疑此黨人
之獨異惟貞潔余一心兮又奚必擇乎都鄙蕢菜蔬以

盈室兮固何足以蔽美攬群物之紛糾兮初何私於一
氣立耿耿於霜晨兮豈欲別一醒於衆醉彼徘徊於清
淺兮亦猶行吟於湘水

五言古詩

七愛詩贈程鄉令趙君

吾愛西門豹其事深可效波神豈荒淫巫言亦機巧大
嫗去不來小嫗足蹠踔豪長涕叩頭從此識政教

右魏鄴令西門豹

吾愛魯仲康治效多致祥害稼螟犬牙中年了無傷椽
驚雉馴擾兒念雛方將河南有府尹其美乃播揚

右漢中年令魯恭

吾愛卓子康作邑非尋常曰不及人惡撫字若弗遑禮
律乃並用化囂以為良解馬以與人不較人自償

右漢密令卓茂

吾愛鍾離意錦製與人異荒縣民無廬茅竹畢繕事亦
有多怖人惜惜惑禍崇祝土矣乃盡神譴不敢避

右漢堂邑令鍾離意

吾愛劉淑芳禮遜以化彊諄諄耳提訓語味深且長念
患為可忍莫入鳴絃堂訟者各感去從今無他腸

右漢雍丘令劉矩

卷一

吾愛傅季珪為事求端倪群愚亦智詐不辨祛厥迷感
深賣針媪醜以食豆雞一縣稱神明鼠輩榛其蹊

右齊山陰令傅琰

吾愛元紫芝卓爾不可移盜虎孰小大許囚虎歸尸音
樂第勝負為于遭殊知歲滿何所為柴車一練隨

右唐魯山令元德秀

詠史八首

蚘鮓有幾許直欲致一甘豈知聖善意見此轉不堪此
母天下母清風使人慙

蚘音堪
土器也

右陶侃母

明知正不足不若斜有餘破衾有何好錦繡乃不如卓
哉婦人言賢於五車書

右黔婁妻

當時詠雪句誰能出其右雅人有深致錦心而繡口此
事難效顰畫虎恐類狗

右謝道韞

琴彈十八拍聽此雙淚流一死固已難萬言復誰尤九
原見衛子何語可以酬

右蔡文姬

幡然棄舊習布裙牽鹿車拜姑禮云畢提甕汲自如富

卷一

貴此一時何可忘厥初

右鮑宣妻

拾遺戒不受見金等沙泥對姑不能食又愧他舍雞其
視取棗人冰炭恐不齊

右樂羊子妻

白首携一壺亂流去何之婦呼叻欲裂彼乃昏不知瑩
篋彈復彈河水風瀾瀾

右朝鮮婦

色不諧朱鉉力可舉杵白貧賤何足云持敬在悠久相
對如嘉賓旁人莫嫌醜

右孟光

示兒

種穀一歲事讀書一生期方春不下種竟歲常餒飢少
年不向學終身成愚痴飢猶一家愁愚被衆人欺彼蒼
念吾父爾輩得令師欲連成堰苗計日如耘耔程文國
有式體制須及時弱冠無所聞出語人見嗤爾勞我則
恤我憂爾奚知中夜不遑寐作此勸學詩

明月篇

海賈不愛死適值驪龍眠深淵頃刻命平地千丈川丈
夫豈無志固為兒女煎彼美頭上粲他人口中涎鮫人

一滴淚不肯隨漪漣眼見懸珠人明月幾缺圓

拙婦吟

生為矮屋女本乏超世姿苟焉執絲枲安得組繡奇人
各愛厥子驕養隨所宜今晨嫁朱門裝束弗適時尊嫜
不厭拙鄰曲莫見嗤或有勸我言學掃長蛾眉妾婦前
致辭拙性不可移誰能事膏沐隨人作妍媸采采南澗
蘋心事澗水知在家盡子職為婦盡婦儀如何識錦字
更製迴文詩

和博古直五首

聖門藹徒衆幾人得稱賢美哉金玉人履行師淵騫寒
甘辟蘆絮飢倚負郭田所樂者何事至道森乎前豈必
扶日月地行即飛仙刀圭償可覓何處今赤泉
少壯能幾時轉盼能白首俯仰百年中蠅營復狗苟規
規一世士禮法自繩糾不趨蟻磨旋空嗟兔株守杞菊
為餽糧雲山作賓友空泥堅白鳴夷惠徒可否
涉世思夷塗理生有常道抱甕灌我園充盤戒鄰棗秋
色何蒼然惕焉履霜早偉哉騎鯨人期茲浣花老渺渺
無窮門何由拾瑤草惟愛柴桑翁稱心固云好
迂疎我何有然諾君不輕卓爾異衆嗜矧茲藹文鳴面
壁愧空腹伐木思友生方當與世混疇能別涇清奚因

一簣盡使此雙眼明欲引萬古脉賴君辨豨苓
曠茲厯億劫矧此浮雲身桑樞弗言病駟馬休笑貧棲
棲魯中叟救世誠艱辛鳥獸豈同羣由也徒問津人世
彈指頃滄海三揚塵揚塵不可詰濟川豈無人

梅陽壬申劬農偶成書呈同官

舉酒勸爾農更為我儂勸車笠雖不同所諧此盂飯或
耕在菑畲或耕在方寸膏雨足一犁田頭怯呼喚五百
維秀驕胥徒乃蝨患與國充耘耔勿使地蒿蔓幻體飢
渴同世味甘苦半盤中一粒食鋤下幾滴汗光陰駛歷
塊彼此不可玩豈為許行言勸課在茲旦老父傾耳聽
童稚繞屏看相顧持我語取信如執卷安得慵耕人從
今不言勸

感興

晨起自理髮握髮雙淚流不見結髮人惆悵空白頭君
留白髮種種作一段愁茁哉秋蓬根念此春莢柔

送使君給事常東軒先生

鋒車洛陽道秋日旌旗光松陰父老語何計攀夕郎南
泉昔樂土畫戟深凝香今為彫瘵區益米憂倉皇一食
不遑暇衆哺安能忘時哉真倪心乎愛龔黃報政未
期年丹詔飛十行正陽初繼離化瑟必再張豈無蘭蕙

叢所思在孤芳履聲到星辰奉階列寒芒
瞻懷赤子情
啟齒玉帝旁唐相有遺烈至今留甘棠

投後村先生劉尚書

采松北山下日與樵者親寸尺拾遺墜時以供炊薪朝
躋白雲岡暮宿芳草濱疏泉溉其本鏡心澄爾神上有
千歲鶴羽儀何振振清淚返華表感時懷鳳麟下有千
年苓剝落惟本真允乃瑩雪玉服之祛凡塵清風發萬
籟天竅鳴驚人嚴霜肅四字玉立古柏身桃李衆自托
六合惟一根梅竹亦有性歲寒爭卜鄰
葛蕪爾微彙願
乞音棄青雲津逡巡不敢止百年在茲辰

東曾梅坡二首

終歲不相見相逢傾肺肝堪嗟半生事安得舊時歡
梅蕊先春白桂華清露寒帽雲行雨意薄暑倚闌干
靡靡秋已駛眇焉幽思殷美人百尺樓脩帽千丈雲白
駒古難繫寒蛩今畏聞得酒且共陶莫惑紙上文

送淮東田制幹回司

青青拱把木人見毫芒時只恐不早種既種何用疑
枝條日已茂雨露日已滋搖本固不可爪膚復奚為
驚颺屢欲折積雪久自支昔日靖郭君四十餘男兒
中有不舉子其事乃甚奇馳聲自薛起有誰敢齊窺
君今已騎

鶴莫問腰纏資主人今晉公相量千頃陂沒勃且並用
參苓恐無遺相如諭蜀檄昌黎後軍詩倘可露一斑豈
無諸公知君來甫兩月雲霧才一披非敢事偃蹇禽鹿
不可羈勿詫我泉石恐為君瑕疵吾且自笑我人知我
為誰

寄窺堂莊使君

煌煌列戟第皎皎深衣人菟符藹夙望駒谷韜絕珍苟
不守厥素曷以當茲晨情敦眷令急心怛鴻雁賓餓死
甘其薇至德文其身耿耿抱孤月悠悠抑蒼旻何時一
握臂漉我頭上巾呼風振我襟與君爽心神欲洗塵萬
斛何處覓一塵

送使君右司趙是齋

皦皦惠山泉脉脉天上潢中含五色文時吐千丈光人
間塵土腥聊復塞我裳南州六月暑千里暘欲狂借此
一掬潤冰雪生肝腸誰起心中爽奪我腦上涼我願去
為龍為雨膏八荒年年刺桐華樹樹皆甘棠

贈無菴道人風鑑

採霞以為食舉雲以為衣飽暖無所為騎風去如飛聞
將電作鏡照見人精微欲說不得說天機本無機

梅陽寄委順趙君

別來柳初茁今見蘭吐芳懷我佩蘭人欲製芙蓉裳山
空蕙帳冷鶴怨秋夜長羣峯暮聳峭蟻夢猶一場乘傳
媿已添刻意思所償虫虫瘴土祇見此淚欲滂鉞石一
時投若為起羸尫常恐二豎黠神被膏與盲欲盡棄其
舊安得師之良夜夢每插羽飛到琴冊旁非貪詆鼎事
欲窺枕中方絨膝倘寄翼寬此百迴腸

寄丘鈞磯

高丘遠望海和思窮渺瀰苦吟有鬼泣直釣無人知有
時捲龜殼箕踞食蛤蜊落日明雲霞狂風無蛟螭全生
帶筇箬聲叟奚為一笑橫大江列岫浮修眉畫圖障
我目隔此天一涯欲携我簑笠風雨從所之漁童緩鼓
柁驚我白鷺鷺我欲從伊人薄酒分一卮

寄梅坡

喬木聳下翠好鳥鳴嚶嚶豈不愛吾廬感此求友聲獨
酌歌停雲懷人淚如傾昔我柴桑翁五柳貧亦禁今予
富千樹况有野航橫鱸魚亦可膾如此夜月明誰諧彼
蒼意澗谷敦孤惇青山只依舊沽酒尋前盟矯首雲帽
人兩臂羽欲生故人不來盤桓無人爭

與石巖方常簿游白水塘觀龍湫

孤燈照不寐獨起行遶牀命駕欲千里千里債已償可

卷一

憐太拙計弗學詩世粧癖嗜鵠聾牙拄彼枯腎腸柴桑
賦移居取友勝面牆奇文與疑義相與窺抑揚願給薪
水役懷此一瓣香自分參也魯或笑道士狂吁嗟古之
人踽踽而涼涼我不欲富貴修短由上蒼齊奴爾何事
彭祖今何方莊周蝶體態淳于蟻侯王龍湫一瞬息珠
琲萬斛強汎汎蓮葉舟淼淼白水塘薜荔為我衣芙蓉
為我裳握石為我飴採菊為我糧興懷自千載有酒且
一觴

己卯六月十一日書石室壁

晏坐圖畫出銀屏列郡山几案空水接舟楫窗竇間清
風蕩炎瘴異趣起懦頑夢隨白鷗去靜看飛鳥還夜深
忽聞笛何處明月灣



國家圖書館, NATIONAL CENTRAL LIBRARY, TAIWAN, R.O.C.

卷一

心泉學詩稿卷二

宋 蒲壽宥 撰

五言古詩

船使王會溪太守趙見泰九日領客枉顧山中
賦采菊東籬下悠然見南山韻十首

翠節摩秋雲朱幡映朝彩欣欣兩賓主濟濟衆僚案此
會良已希斯文固應在寂寞秋後香今晨有人采
結彼山下茅對此山上瀑白日成蹉跎長年抱幽獨嚶
嚶自禽鳥踽踽亂樵牧門巷何多車山中有佳菊
龍山在何許驅車故城東壯遊值佳月高懷激清風深

知孟萬年獨有柴桑翁至今家傳香索之逸芳叢
淡淡暮秋色行行遠疏籬最愛重九名擬知柴桑詩風
流足千載感慨彼一時此日不易得有酒安可辭
白露零高寒西風滿原野濁酒歡重持黃花笑盈把詩
句斐莫裁秋容浩難寫豈為今日娛逢之百世下
晨策登青霞衆峯鬱綢繆舉目嗟新亭緬懷憶神州酣
觴氣磊磊感物心悠悠偉幾此二翁高風繼前修
南陽有菊水一掬清且鮮滿渾浸秋色餐英飲寒泉將
以壽道脉非惟制頽年豈不隨衆草正色乃自然

百年豈非常流光迅飛電月渚愁眉鴻風簷淒去燕鴻
燕胡獨乖參辰豈相見念此霜中英良時不妨殿
匡廬詎云遠日日望翠嵐黃花裊露掇薄酒如飴甘迨
迨想高趣疊疊懷清談緬睇良有以舊居在其南

天台赤霞頂峨眉翠雲間人物自楚楚文采何班班屈
宋豔何摘陶謝高可攀咳唾隨天風萬古輝此山

王蜀人
趙台人

九日簡留松澗

滾滾白露墜獨起行遶籬豈泥茲晨游偶諧昔人期白
衣已縹緲幅巾自淋漓舉杯泛寒榮何以慰所思登山
極野望涕泗空漣沍戚戚霜葉語雁過鳴聲悲參軍爾
何事帽側無人知莫輕一時謔飴此千載嗤餐英飲沆

濯政生騷人痴起酌彭澤翁此意堪語誰

心泉

山泉不知源流出石磊阿坎止心維亨蒙養行必果久
視空無塵靜趣自忘我明月知此心時印夜光顆

九日貴客入山地狹不足以容歌舞故作

莫歌亂我蛩莫舞踐我菊歌不入此耳舞適局汝足蛩
吟今古心菊老貧賤屋斟菊聽我蛩絕勝人間曲

和漳浦余明府

割雞薦鸞刀飛鳧躡仙跡惠與清漳流名高魯山石廉
謹今所難吾道幟可赤作縣既有箴救世豈無策澗水
疑鳴琴中宵起人憶

呈大帥侍郎陽巖洪先生

猗桐擢新翠况此當陽春靈鳳何高翔豈不懷朝光積
陰既去屏先鳴詎能忘腐草倏已化破桂安所藏聲猷
動震海偃蹇持孤芳清風肅羽蠹白日成圭璋允期薦
清廟欲與興頹網恩綸甫雜選符采相輝煌元祐心可
續江左脉自長精神夙聚會廢歌藹明良願整池上翼
繼我文靖梁

上船使監丞王會溪

抗意欲窺奇栖潛在郡秩猶疑甕為天豈信盲問日清

晨非夢寐見此五色筆寒光動斗牛餘照墮圭華目前
千古在故吾一日失至道涵深純大雅藏憫瑟懷茲泉
石心賁之林野質百年豈不短萬羨從此畢倘云可與
語敢憚行以膝

登師姑巖見城中天閱恍如陣蟻因思舊從戎
吏亦其中之一蟻感而遂賦

晨起捫層巔蒼茫見塵市鞞鼓生遠陴壺蟲在幽耳遙
知細柳屯于時閱軍士俯彼萬鎧羣微哉一害蟻初集
如慕羶俄擁如聚米或圓如旋磨或方如緣儿隱隱牀
下聲牛鬪差可擬未熟黃梁間忽憶大槐裏昔在羣蟻
中不知蟻是己長揖謝孫穰微笑辭翦起蠻觸胡為哉
雞蟲今已矣醉眼未醒時此真尺與咫更陟最上頭須
彌亦芥子

送郭濟叔分教邵陽

秋山多爽氣南楚登修程豈無離別懷此別人所榮賤
言紫帽秀翹然碧流英千載木鐸寄一脉濂泉清無羶
不言寒有道當自鳴采芹發新謠吟藥生逸情汾陽昔
何人努力加令名

古意答胡葦航

偃蹇當風松四望無寧枝薦蘿空自纏鸞鳳非所羈固

乏棟梁具聊聳巖壑姿豈無深林柯百尺懸旌麾下有
千歲苓勿使行人知

送遠曲別葦航

驅車晨出門薄酒持送君離心一寸鏡修巔千重雲遙
憐風雨夜應念霜雪羣猿鶴豈敢怨所期在斯文

見山臺

疊石生幽雲層臺起修竹羣山不出門一日俱在目遠
眺極悠悠男兒豈碌碌寶匣長夜鳴黃金幾時築此事
誰與論掀髯對雲麓

泊舟蘭溪

江流萬古意客遊邁中年茫茫見遠樹渺渺嘆逝川旅
舟泊明月溪謳出長烟千帆趣各異萬里愁共煎船頭
有美酒吹火煮小鮮丈夫非無淚不洒商婦弦

登師姑巖懷古十韻

郭中愛青山推窗納青碧不見山中人白雲自堆積登
瞪廓悠悠此眼亦已窄但見寰中塵不見塵中客相去
詎幾許恍若萬里隔日暮攀崔嵬泣然感疇昔蜀道無
人行嵩山絕蹄跡豈無九回腸安得變飛翮傾我百壺
酒撫千丈石不知蠟屐翁著得幾兩屐

仲冬下幹會同僚遊東巖

圖經云此乃仙人蛻骨之地中有石鼓扣

之震
響

羽人脫屣去古洞留嵌巖白雲亦世態隨風蛻其絨石
飴已何許誰能味其甘上偶寂不語樵牧同此龕坎坎
擊百鼓歸去夸彼談遂使蠟屐人於此移其貪椅桐植
翠蓋翳翳當薰南琤然激石流燕坐心默參朝暮豈異
理莫狂狙四三暄涼得其適所訝非瘴嵐梅花對白髮
風前雪鬢鬢揮觴屬同僚出語諧酸醎猶拘鐵漢語飲
之不至酣他時紀曾遊誰將鐵為庵

寄豫章李明府

太白搖芒芒只在西山陽常言欲千里一夜千里長酒
盡還磊砢出匣鳴干將蘭菊猶可秋白日安可量

亦竹軒

娟娟竹上露泠泠竹間風風露自高潔軒窗亦玲瓏明
月散清影獨起行遶叢緬懷愛竹人氣味千載同

六和塔僧房

天風語簷鈴蒼靄藏古殿穿竹逢緇衣拈花對黃面誰
把山水心為我露一線推窗古樹隙空水還匹練山色
忽有無潮來半空濺須臾簸舟楫木葉飛片片魚蝦恣
掀舞洲渚入烱煉山僧寂無言千帆閱將徧

送梅峯阮監鎮東歸

卷二

豪氣宇宙窄健筆風雷驚處揮笑羣蟲有酒甘步兵半
酣百年寄一嘯千古輕青眼能幾人白首識此情

噴玉布

採孟東野詩語

蒼珉卧偃蹇飛瓊漱潺湲東野噴玉布廬山谷簾泉玉
釜敲寒冰隨風走連卷清聲足洗耳枕流恐徒然

梅陽郡齋梅花五首

廣平一寸鐵不信句鍊柔猶疑雪月競韜玉無處求神
人藐姑射夜趨嫦娥遊縹緲不見天風想琳瑯
孤山隱君子搜索入幻眇方且判鴻濛倏爾得一竅童
鶴俱不知吟成忽自笑翛然脫情塵高標立寒峭

江南擅名勝雅愛陸敬風豈無可以贈折枝寄郵筒絨
香不敢泄千里一寸衷對雪感歲暮白頭漫西東
卓哉誠齋老驅車陟崔嵬清風欲洗瘴駕言為花來仰
止冰玉人念彼同根茲思翁不可說江邊重徘徊
枯株類鐵漢瘡癩不敢侵歲寒葉落盡微見天地心陽
和一點力生意滿故林至仁雨露澤不覺淪肌深

萬壑清流

旨哉哲人語有道親為傳清流出萬壑千載此兩賢誰
傾六月雪洗我一片天妙趣不可極如此山中泉

白水巖

泰山有積雷坤媪乃善藏何時發靈秘一脉流膏滂至
仁及物意後世疑濫觴蝸蟠久懶卧辟易離雷光豐隆
亦豪士夜半驅阿香天鼓何處來大雪驚飄揚飛星雜
兩射怒電翻颯狂倚欄兩眼眩應接俱弗遑呂梁三十
仞吾聞老蒙莊行歌不憚勞習坎守故常峨眉有仙伯
佛迹窺荒唐濯足弄海月戲侮相頡頏堪笑失筋人氣
骨何羸兀醉呼李太白欲製芙蓉裳此泉願為酒萬斛
輸滄浪簡寂耿我夢九疊迂我腸雁蕩更詭異龍湫舞
堂堂何當寄鵬翼瞬息天一方仙人笑擘脯滄海觀種
桑人世彈指頃萬天天地長

戲效浪仙體

碌碌復碌碌世事安可卜為蹶輕四蹄夔行矜一足知
守吾輒難遑問羊腸曲行行復何之幽人在空谷

書會溪柳陽瀑布圖後

山椒斫寒翠澗曲彼玄圖寫此一派潤化作萬頃腴誰
知田中木粒粒心上珠

楚山亦瘴癘湘水多幽靈高颺雷電激盡日霰雪零滌
去熱惱腸清風自泠泠

千山六月火可使金石然懷茲水一滴想彼心千年願
君倒天飄流澤無中邊

草堂瀑布

西瞻香爐氣北望鐘山英寧如坐巖曲飛玉光欄楹異
哉天地秀孕此冰霜精梅花立其旁姑射浚寒清仙帔
月耿耿神佩風琤琤窗戶六月冷草木三冬榮錦水懷
步陵銀河照長庚所嗜同不同聊復娛吾生

題瀑布圖後

平生託游從林野乃其趣出處偶不同清濁良已忤解
組浣我塵叩門為君訴方殷岐黃事何日當展晤欲漱
巖下泉蛩驢念同路默携照膽鏡歷歷見情懷韋韞誰
為驅千林瀉懸布初掛冰一簾晶晶滴珠露弄雷不輟
笑轟谷激電怒玉虬擘重崖白晝雲雪沍震掉若弗容
俄然晚沉痼寂寂霜林鍾茫茫鹿溪渡草堂香山基興
廢今幾度誅茅詎為晚千古一旦暮與君共茲圖濯濯
如振鷺登眺晨百回疇能局高步

中庭步月

月光被中庭竹影弄幽色瀟瀟一幅素灑灑數莖墨忽
然風動處惟有月寫得此畫應入神無言自心識

純陽洞讀書和中山陳禮郎韻

弄珠寄南海移文譏北山出處雖異位夢覺同一關純
陽有真境古洞扃林端絕頂象緯逼六月天氣寒道人

討幽勝誅茆謀蓋棺緣深野雜狎供罷齋魚間斗軒適
容膝點勘酬鈔丹理義貴自行神仙諒非難嗟我久荒
索摧心罹棘艱羞羨鶴俯仰空悲馬班桓終南在何許
得去何須還

又題純陽洞

十里捫藤蘿千崖插虛碧仰覺雲漢低俯見塵市窄小
山走委蛇遠水別支脉身騎鶴鶴枝目眇大鵬翮更有
千載人幽巖脫空魄朝躡一片雲夜嘯百丈不我疑真
人去留此守四鳥道人既無心何事苦著跡我有一壺
酒起舞酌仙伯松槿雖殊途宇宙同作客

枸杞井

四時可以採不採當自縈青條覆碧甃見此眼已明目
為仙人杖其事因長生飲生枸杞水與結千歲盟

山中井

乾元肇初氣坤母乃六之誰期爰象意鑿出混沌奇所
以擊壤民飲水源不知空山有石甃夜氣方歸時明月
照我牖獨起携軍持一瓢飲沆瀣涼意生肝脾下以澆
丹田上以滋華池瀟然脫塵上舉身入希夷神人授我
訣欲以療我飢歸來煮白石積饌瓊為糜

菊花潭

何處無甘菊何處無清泉菊泉適相值天地何嘗偏豈
但為九日可以踰百年願與潭下村餐英汲潺湲

古意

梳鬟照寒泚寒泚知貞胸整鬟摘秋芳秋芳無冶容平
生幾偃蹇今逐梁君鴻既乾布裙績寧厭短褐舂剔目
信已篤封耳何所從獨撫筇篲謠河流自淥淥

頭陀成菴主刺血寫華華經

丹書何切切滴心不滴血縱使血可乾其如心不竭蜀
鳥啼作花至今萬山顛殺身以成仁遺訓有先哲

燈蛾

出暗亦已顯傳翼乃不任趨炎弗知止倏忽遊燧林不
見異域傳乃有噉火禽

蜜蜂

四時有佳卉兩股不停採花露本清冽安用如許甘平
生事苦口氣味轉不諳

蜘蛛

輕絲出罅腹口織不用梭前身豈虞人所食在網羅茆
欄亦可罾如此多者多

促織

炎夏居壁根深秋噪籬側安得懶婦名豈其曠乃職不

念作繭勞徒能促人織

卷二

蟻

玄駒不可繫若象寧無端南柯二十載夢覺指一彈誰
云丘垤微轉覺天地寬

蠹魚

種芸豈辟蠹無水乃有魚平生破萬卷曾次藏石渠何
如葉上蟲篆出先秦書

捫蝨

上即居人頭下即居人身夙豈為人食今乃務食人不
必勞爪指聊以捫對賓

蚊二首

白日泓溝渠中宵隱堂與觸處招燎烟幾人有良疇
眈知若何口噉布計暴
畫伏夜以動血人謀其生不作林中虎而為帳下蟲
飢
虎有時逢林密少人行微物不可忽羣聚成雷轟衆
蜂
錐刀鋸矮屋甑釜烹膚爪良自忤扇撲勞迭更下車搏
猛虎一死政自輕纖纖無所詰長夜不肯明為我驅蜚
廉么麼一掃平

蚤

疾跳若幻術常笑蚤縫拘動致磨齒牙害止搔皮膚纖



芥何足云有人飼於菟

卷二

心泉學詩稿卷三

七言古詩

神駿歌送趙委順就漕

神駿不受羈豈知日千里小試秋風前爍爍雷光起何
須金絡腦不用珊瑚鞭徐看血汗沫透出青連錢飛去
渡赤水橫行抹燕山持歸獻天子高列十二閑渴飲水
底月飢餐草上珠輕搖玉塵尾惻碾青氍毹振鬣長鳴
謝伯樂千秋萬古八駿圖

子別母呈所翁陳先生

心泉學詩稿

子別母欲別牽衣意何苦母有衆兒俱母憐兒無別母
兒誰乳海惡寧匪蛟山饜莫如虎小大不相棄高深自
為扈萬古天地中何得如母所披絮成踟躕履霜正淒
楚不見城上烏相隨八九子反哺何足云慈烏乃如此
引翼且莫高短翅將千里

醉歌

有人八百歲作鬼三千年如此豈不夭或者稱其綿大
椿一春秋為歲各八千久矣摧為塵朝菌猶目前燕生
一息頃直到羲農邊誰謂未來事如添未來龜鏡已在
先天地一指掌日月變跳丸搏沙小兒戲滄海為桑田
南華達生亦已死伯倫半醉不是顛讀書堂上眼如月
輪扁釋鑿乃鞅然高車本桎梏更被繩墨牽利澤苟未
諧仁義空自煎有客區區老山澤不鳴不食稱神仙呼
來飲酒不肯飲月明騎鶴遊青天舉杯邀明月舞影各
自憐必求至樂何者為至樂今也不樂何用空拳拳

菊露謠

清晨採黃菊露滴菊花叢黃花泣白露白露晞秋風秋
風莫相試菊蕊心不同蕊露明朝落不落黃華獨老秋
風中

送劉童子試藝天京

神童八歲能文能射陣圖
先天圖撰著法皆能之

心泉學詩稿

二

硤硤頭角出羣玉炯炯瞳人翦秋漪神光現作照書同
一覽千古無復遺殊科自可獻上國况能文藝超等夷
河洛圖書識蘊奧更明文象通神著陣分八勢演古法
操弓挾矢動有儀眼前大要固如此有人頭白俱不知
當今所重不在寶方旌聘召方四馳豈無古人已成算
時乖事異難設施秋風邊塵浩無際綸巾羽扇思見之
終軍棄繻繻尚在劉晏正字字或歌終身願秉清忠節
芳猷可繼大年詩

送沈保叔國諭試藝右庠

讀書讀心不讀跡以言易言竟何益射弓射志不射箭
以力假力何足羨因蹄得兔蹄安用以虎視石虎則中
設科取藝良已拘分毫得失如擣菹微官况復多緹墨
千里思馳用羈勒生女嫁屬他人屋生男不出出許國
堂堂八尺無創瘢如斗金印梔蠟顏一條秋水持贈君
腰間願看生風雲君不見唐家將相婁師德也曾應詔
紅抹額過鐘飲滴皆兒嬉握拳透爪真男兒

君不來詞寄雲帽上人梅坡翁

君不來山中底事堪嫌猜積雨愁人可不道至今聲跡
何寥哉竹風微動攬衣起使我一日腸九回君不來門
前日日添蒼苔

送林城山歸上饒

平生喜誦城山句一誦千回起狂慕夢魂夜夜峨眉
峨眉只在家西住照人樓蜃嘘青紅落筆天虬走雲霧
冥搜古髓生潤芳坐演正聲入韶護蘭宮璧水俱雋功
金馬玉堂豈迂步何人為叫閭閭雲試使琅玕一披露
男兒豈暇謀溫飽丹心要使輝素素水潮方仰昌黎韓
日邊又起長沙傅玉山萬仞高峇峩玉淨瑋悅朝暮
嗟哉精衛愚復愚海石悠悠力安在傍人齟齬看痴狂
持此痴狂向誰訴古來離別惟有酒此別情酸酒如醋
萍蓬萬里終有家而今更把家路

送孫畊山

梅落痴風寒屬鼎海雁驚春動歸思蹇驢石磴空踟躕
黃犢青山勞夢寐千載休疑漱石訛幾人堪說種瓜事
南州高士不可攀俗吏空餐抱深媿

贈日者馮鼎山

馮君胸中爛星斗測人窮達誰一偶得錢便據青旗亭
北斗還堪把漿酒醉來訪我梅花傍索飲哦詩恣狂吼
平生許予皆公侯大軸長篇玩盈手不言于麓神仙人
泣雨滂沱氣填口與君生長醉鄉國借箸前籌為君剖
東坡固類韓昌黎伯倫何如畢吏部何處有酒三百壺

姓字甘書酒人薄畏死安能抱仁義貪生不解推子午
酒星此去任何宮相後且作糟丘主

濯足瀑下

石峽轟轟作雷吼白虹飛趨雷光走老蛟攪起陰壑藏
雷雪當空射瓊玖禪僧倚錫疑欲飛兒童驚呼不停口
山夫伸足承下沫陰風凜凜生毛髮雨飛如箭任不知
旁人休猜鐵為骨

壯哉亭觀龍湫作

雪車冰柱劉叉狂玉川更與相頡頏車聲羊腸幾盤折
飛冰走雪何茫茫天公矜此老怪物六丁直下白晝驅
阿香豐隆列缺一時起千車百柱摧靡靡玉蚪銀闕掀
霜髯藥兔蟾宮擣瑤髓濤驚波駭不可摹壁碎珠傾詎
堪擬長風吹雨一座寒兒童不敢正面看狂客何心助
鼓譟硤石萬頃思波瀾披髮行歌恹狂想寶華天雨寧
專賞炎天上火下如湯一派清泠浹鄰壤勸君飲酒君
莫疑有酒不飲吾何痴夜光魚目紛紛雜錯烏可辨眼
中如露如電醉來大笑俱不知

登北山真武觀試泉

莫誇陽羨茗在彼山之巔莫誇惠山溜試此山之泉不
生陸鴻漸渴死盧玉川且共春風裏不鬪社雨前雀舌

最嫩弱植耳嘉樹一發如針然靈苗合壤武夷共清香
不與羅浮專北山古丘神所授以泉名郡天下傳置郵
縱可走千里不如一掬清且鮮人生適意在所便物各
有產盡隨天蹇驢破帽出近郭裏茶汲井手自煎泉鮮
水活別無法甌中沸出酥雪妍山中道士不識此彈口
咋舌稱神仙從今決意脩茗事典衣賣樹蔕井邊道士
且莫顛古人作善戒所先山中種茶一百頃不如山下
數畝田飢餐渴飲無長物何患敲門驚晝眠

遊金山寺呈茂老

長江氣勢何雄雄波心幻出青蓮宮江流萬古浮不去
疑有根蒂誰能窮溯流遠見一培塿傳聞壯觀疑談空
風帆漸迫驚詭異金碧還遶深蒙茸小舸破浪與客去
繫纜階石穿玲瓏門前筆架水面立波濤日夕相撞舂
重樓複道費登陟面面奇快陡不同丹徒西望聳觀閣
淮海大塊居其東倚欄簷外水轉窄飛鴻沒處明雙瞳
與僧煮茗話今古莫窮幻眇窺鴻濛瀛洲方丈在何許
騎牛覓牛休憧憧遙指危檣夜泊處驚颺飄簸如飛蓬
禪關深閉浪打屋夜定不動猜遊龍清遊適值九月九
汲泉細摘黃花叢水上登高復誰信證明賴有今遠公
登山恍惚見坡印瓣香起敬仙佛蹤想像形容記言語

卷三

涕零心惻生不逢未窮清興下山去扁舟一瞬在閩風
作詩聊復紀遊跡來尋此跡何時重

遊西巖

劉元城赴貶
僑居之所

誰扇洪爐欲煮鐵一寸如冰不曾熱歲寒心事梅花知
炭事如何與水說西巖作屋烟作罩斑斑不露如隱豹
人生不欲剛斷除靜處深崖乃仁樂碧屋翠竹琅玕
寒泉玉佩鳴珊珊終焉為計亦不惡豈知白日生羽翰
翻思一夜鐘鳴時先生高卧如希夷何人更嗔瘴鬼癩
及鋒而用皆驚疑荐泉採菊想遺跡奚其與侶昌黎伯
薰蕕已定人所知聊把曾遊紀巖石

書草屋壁

天地無終窮萬物乃芻狗勿誇杏為梁何如甕作牖昔
聞巢氏民仁義亦奚有蠢蠢不識知居居自醇厚今來
豐屋士文法因繩紐力競蝨蠹蟲計生養狙叟誰家甲
第巍入雲何人鷄衣不掩肘豈知鬼瞰因高明安得春
陽到窮蔀蝸廬能幾何蠻觸勝亦自憶我柴桑翁荒宅
十餘畝草屋八九間柴門五株柳野水滋粳稌春畦定
蕙韭永日為琴書停雲念親友儀秦枉饒舌施龍漫多
口白衣蒼狗安可知不夷不惠自不否

愁劇忽失笑

愁劇忽失笑不覺心夷然量珠成斗笑不賣鎔金為海
悲不煎蜜蜂與蓼虫生死甘苦緣今也不為樂人有幾
百年士龍莫笑跌落水水中不著此笑仙

九日

芙蓉披靡秋水寒吳妹越艷芳思單漫把黃花事佳節
黃花不入歌舞歡昔人戲馬走强健今我為酒空嶺岫
黃花無言不可詰青山落日明歸翰

心泉學詩稿卷四

五言律詩

送莊糾之官蒲陽

荷橐藹諸孫英英列戟門能聲家有譜清識郡無冤松
影旌旗道梅花玉雪村親庭兩驛便時得問涼暄

歲暮度明山嶺登山庵追慕先人不勝悲愴因
用楊敬夫韻

歲寒霜露感况復度高深雲木猶如此苔磯不忍臨溪
流一線碧門對兩山岑含涕危亭曲遺言尚可尋

宋 蒲壽晟 撰



友人若木余兄告歸詩以送之

兩年遊海國一半在山扉
政喜沙鷗狎忽驚遼鶴飛
苦吟黃葉落凝睇白雲飛
志已堅親養難分薜荔衣

寄徑山書記悟上人

人間傳妙語塵外更深藏
寢食因吟廢形骸欲坐忘
瘦林秋見鶴斷磬夜聞螢
出定生幽思窗虛月在廊

寄思溪老藏叟珍上人

萬折苕溪水精廬若箇邊
菰菱時入供包錫暮行船
月朗無雲夜雕橫欲雪天了
知身是客莫負故山緣

寄老溪上人

已知山是石掛起碧筇條
寒在黃梅樹門當獨木橋
寡交因天惡默坐聽蟬調
同道何時過心慵不見招

招枯崖悟上人住山

山僧如病鶴意氣獨離羣
思共孤峯月間分半榻雲
井華晨起汲瀑布夜深聞
相向無言說窗間草木欣

和胡竹莊韻

脫落皮毛盡而今腸亦無
泣非緣楚玉聲不叶齊竽舉
目雲天迴論心水月孤
祇應飲美酒跳入費公壺

次清老弟韻

恐負東風約清吟野步遲
淡烟楊柳外微雨海棠時
遠

寄千杯綠多情雨鬢絲閒愁須遣盡蜂蝶不堪羈

趙委順寄詩山中因次韻

欲言誰與共冉冉日還斜繞郭多春樹隔江生暮霞滿
堤吹柳絮一舸汎桃花唯愛鯿魚美垂緜傍古槎

題梅窗嘯月圖

梅花紙帳夢耿耿欲宵殘何處幽人嘯一窗明月寒素
光流肺腑清響動巖巒擁膝無言語歸來意自歡

贈隱者

自是山林僻何心與世疎土鐻三合米竹牖半牀書月
樹迷歸鶴沙泉數過魚無人覓巢不必更深居

挽呂秘書

玉階空憶去破屋古梅旁猶訝黯言直不磨遷史良葵
心猶古髮槐夢落黃梁最後龍門客恩深涕泗滂

悼亡

百歲期偕老半生塵夢訛方諧委畚事忍作鼓盆歌野
水悲蘋藻秋風泣薜蘿青燈課子誦此意念君多

小兒生日

今年二十八細憶始生時漸喜山多樹尤憐水滿池相
寬吾老大自教爾童兒佛誕明朝是然香共展眉

贈日者王談天

卷四

問天天不言君更欲談天只且話明日豈須窮百年已
靈機石事猶夢蟻何邊為扣希夷老如何尚愛眠

阿助守歲誦杜工部四十明朝是之句請足成
四十明朝是瞻天祇乞間自慙身計拙早覺鬢毛斑守
歲後兒喜攬春借酒顏盍簪喧馬意清夢五雲間

送枯崖悟上人省覲三山

遍踏長松影行吟入畫屏秋江一葉渡落日數峯青白
髮干新夢黃花制晚齡片雲何日會重約在林扃

即事

江樓人卧病寂寞更誰憐有子常離抱無家可祝先雕

牆笑茅屋滄海幻桑田昨聽東鄰訃浮華亦夢然

約趙委順北山試泉

擬尋青竹杖同訪白雲龕野茗春深苦山泉雨後甘鳥
聲塵夢醒花事午風酣靜趣期心會逢人勿費談

春陰偶成東枯崖

砌蘚頻侵綠野花相避紅不知昏與晝惟見雨和風有
酒為寒盡無詩非景窮地爐煨芋火時約老僧同

友人余兄歸小詩寄胡葦航

別去又梅時夷塗豈倦馳能存二頃事寧畏十年遲耐
冷心如鐵因吟鬢欲絲猶嫌夜來夢不解說相思

寄胡葦航

別來梅正謝，愁坐柳成陰。
救世有何策，圖名非本心。
萬言難復古，一語儘醫今。
已向山中老，因風懷所欽。

九月九日登山

日月百年寬，良辰天不慳。
秋來常對菊，情適便登山。
戶外無塵鞅，籬邊有酒顏。
當時老彭澤，幽事獨相關。

題江心寺

聞說東鷗勝，茲遊心頗降。
江心浮一寺，水面立雙幢。
路絕帆當戶，潮回月漾窗。
悠悠懷古思，把酒酌漁缸。

七夕前二日與窺堂莊使君橫江觀水望霓帳

然

倚欄人不識，懷古尚心驚。
坐想瀰漫意，卧聞鞞鞞聲。
浪翻京口寺，潮打石頭城。
莫說南柯事，相寬老大情。

溪堂春日即事

祇是此溪山，須將舊眼看。
鷗飛綠不染，鳥沒草如攢。
雨過巖巒淨，潮來天地寬。
莫浮茅屋去，犬吠拍欄干。

八月十三夜道士湖汎月

萬事廓悠悠，因貧得縱遊。
天慳一樣月，人有幾中秋。
短笛芙蓉浦，芳尊杜若洲。
清狂欠拘束，誰恕道家流。

寒山暮景

青山寒似削黃葉掃仍飛落日行人急
痴風過翼稀老雞尋舊杙野犬吠
緇衣獨倚枯藤立柴門候牧歸

三疊泉廬山簡寄觀十五里一名擲泉

此豈凡間物神人疑屬饜踏翻雲母
碓放出水晶簾娥女愁遺珮冰虬或
弄鬢絞綃一百丈織出浪紋織

題純陽洞

路入松蘿去間眠石頂雲半宵忽聞
虎六月不飛蚊烟郭多年晝晴疇破
衲紋世無俱絕粒持鉢不如耘

重陽

黃花渾似舊白髮忽驚新爭說參軍
帽誰憐處士巾折腰寧不辱有酒未
為貧絕愛南山色相看意轉真

題海雲樓下一碧萬頃亭

倚欄心目淨萬頃一磨銅欲畫畫不
得託言言更窮陰晴山遠近日夜水
西東此意知誰會鷗邊獨釣翁

心泉

來尋萬古意聊結此生緣久視都無
物中間只見天靈根何處覓露液曉
初鮮白髮今如此捫松憶少年

石潭觀魚

拂石搯頤久閒心寂似初不知潭是
水寧覺我非魚欲數猶疑幻相看若
在虛星星雙鬢影何事入方誰

題金粟洞

天風吹絕頂小立客思豪遙海望無際衆風疑避高龍
留神骨去犀斂夜光韜惟愛瑤池水尋雲學種桃

種麥

荒林僻左地時已及來年頗學鴉種麥可憐人代牛莫
言耒耜苦且願甲兵休來歲如旋磨機輪向瀑流

委順趙君見遺千里小景鴟鵂圖有詩將之用
韻為謝

朝拂扶桑影暮尋明月枝羣飛心共遠三匝意猶遲相
向無聲裏應思落筆時寸程千里闊惟可與君知

送清老弟歸荆湖幕

驅車出閩嶠微宦歷江湖沙塞馬蹄疾水天鴻影孤楚
天時卧鼓蜀道日飛芻萬里戎旃客何當表丈夫

聞蟋蟀有感

煎煎促誰織機杼咽空林何處露藁下入人秋思深清
燈一綫淚孤枕百年心此意知誰會悠然太古音

挽仁山楊先生

滴盡艱難淚肝腸鐵似頑忍教師道絕還向我翁潛命
也吾何憾天乎識固慳平生脩潔意千載此西山



國家圖書館, NATIONAL CENTRAL LIBRARY, TAIWAN, R.O.C.

心泉學詩稿卷五

宋 蒲壽晟 撰

七言律詩

周翁雪舟送春韻三首

錦衣年少不知愁，風雨無端惱客遊。
萬點殘紅空過眼，一番新綠又從頭。
夕陽細草堪橫笛，野渡垂楊可繫舟。
三百六旬渾是醉，餞春何用苦綢繆。
隙駒如箭未堪憐，晴雨悲歡付自然。
九十春光能幾日，一番花信又明年。
殘紅數點心終在，垂柳千絲意許妍。
說與游人莫惆悵，綠陰幽草一般天。

底事黃鸝喚不休出門欣見綠陰稠殘花滿地無人掃
芳草連天起客愁淚落田間聞牧笛醉歸江上問漁舟
杜鵑也合催春去何處而今孟浪遊

送擇齋先生徐大監赴建倉

帝命元臣選外臺南州聲望久崔嵬倉箱早辦九年集
原隰欣迎四牡來父老此時方見日吏饜平晝忽驚雷
錦衣翠節鄉拜重耿耿文星照上台

用老竹與子晦韻

冰清玉潔好風襟老屋淒涼興味深身世已非塵外蹟
語言猶是竹邊音且陪此日鶯花樂休憶當年燈火心
白髮相看能幾許樽前須要惜光陰

和楊芸齋送枯崖住興福韻

一夜春光到竹門東風拂拂動閒雲鉗鎚粗了人間債
餅錫斲拋林下羣烟塔忽驚當戶立霜鐘猶記舊山聞
高談疊疊天花落老衲廊頭意自欣

寄石隱老嶼上人

已約巖頭同數宿如何消息竟茫然抱琴有意彈明月
泉藥無心到絕巔不過虎溪安得笑偶逢醉石便歌眠
山林此樂而今少一日相從是宿緣

和倪梅村

卷五

偶携琴冊傍林泉，坐對梅花記往年。
鴻雁何心成巧避，變蛇無語自相憐。
才吟瘦影黃昏月，又見殘紅細雨天。
擬把楚騷重載酒，掀髯抵掌話前緣。

再用韻和葦航

長江不直一杯寬，自笑狂生筆力慳。
有酒何須誇戲馬，遶籬豈必強登山。
世無劉表誰知己，人說淵明我厚顏。
風雨滿城都過了，多簪黃菊出松關。

與小兒助子遊江橫作

葦荷偶憶湘纍句，築屋還尋杜若汀。
孤樹每留殘日白，片帆徐度遠山青。
海鷗知我斷機慮，漁父與誰分醉醒。
何處扁舟橫短笛，月明風裊不堪聽。

江橫暮景

獨倚闌干對暮霞，垂楊古渡欲棲鴉。
漁翁何處烟藏浦，白鷺成羣月漫沙。
淚落西風叫黃鵠，酒闌深夜聽琵琶。
誰人得似鴟夷子，一葉浮雲總是家。

再題江橫

一榻虛明懷抱幽，水天無際望悠悠。
潮來不覺沙洲沒，浪打只疑茅屋浮。
何處漁人橫短笛，有時嫠婦泣孤舟。
忘機何必曾相狎，說與江邊羣白鷗。

遊鼓山題天風浪濤亭

脩脩白髮倚欄干笑仰高峯中袂仙但見烟霞相遠近
不知宇宙有中邊宦途人在非凡境客裏身遊極樂天
自歎情懷今潦倒重來未識是何年

送使君趙寺丞泰先生

別郡豈知是此州攀轅合借我公留求仁而得又何怨
蔽美豈其為好修花徑怕風宜落絮秧田無雨恐妨年
春歸誰識春心苦才說思春欲白頭

寄何我軒

十年不見此髯翁笑我而今鬢亦蓬幾度因詩親水部
一回看劍泣山公無心塵世雲移岫極目仙壺浪拍空
痛飲劇談非是夢寸丹長與荔枝紅

間坐海觀興致悠然是時月白如晝

一笑靈龜尾曳塗扁舟聊復寄菰蒲潮生潮落帆來去
雲卷雲舒山有無風定若教胥怒息月明空憶蠡遊孤
漁翁不識人間事白髮青簑酒滿壺

嶺後山莊

感慨重來歲月深手栽松柏已成林萬山自此無南北
一水長流不古今先訓丁寧猶在耳老吾寂寞自沾襟
君恩已遂祈閒請莘野歸根是本心

回謁藍主簿道傍見梅偶成

誰家一樹鐵斜欹的皜疎林出短籬黃葉久隨風捲地
幽姿當與雪同時白頭朔漠窮蘇武瘦骨西山餓伯夷
三嗅清芬一杯水徘徊無語笑掀眉

題深省菴

結草為庵寄一枝鐘魚聊復事清規野蔬入供無人識
古柏為香有佛知頻去飲泉非為渴偶來坐石忽忘飢
常談且接頭陀伴欲說上乘空費辭

依韻寄呈林城山

隣蛩深夜語幽幽猶此塵埃一散裘甘菊已荒歸粟里
蒲萄堪醉勝涼州知心海上千年鶴極目雲間五色樓
白髮正殷松柏念不因泉石老斯丘

即席用委順聽甘師琴韻

猶抱琴聲感歲年冥搜趣外欲無絃廣陵寂寂嵇生去
秋水悠悠鳴犢賢一點山泉巖竇雨數聲瑤珮沈寥天
音微千載何人會願和薰風殿閣前

與興福老枯崖乘月觀濤

無心携起碧筇條偶爾來從漁父招山色多情似吳越
濤聲牽夢到金焦魚龍一任風雲便鷗鷺不知天路遙
共倚欄干秋月白豈期真樂在今宵

西巖

有蜂巢
鶴柵

石路層層碧蘚花，矮窗低戶足烟霞。
愁聞獨鶴悲寒角，靜閱羣峰湊晚衙。
野菜旋挑奚待糝，石泉新汲自煎茶。
爐熏銷盡拋書卷，閒倚欄干看日斜。

贈洪都高士蕭野鶴

亦號野田

自後華表去，踰躑穀頂丹。深不計年萬里，孤光中夜月。
一聲清唳九重天，偶然夢覺思遼海。不是飢驅向野田，
赤壁秋高風露下。無心曾喚老坡仙。

贈吳仰雲

雲中羽扇得真如，不用羞慙非故吾。入手千般休說幻，
轉頭一著不為愚。塵中羈絆無還有，物外逍遙有若無。
我若忘機曾悟此，烟波鷗鷺是吾徒。

歲旦勉田鄰

歲律從新泰道亨，出門欣見麥青青。已無關外石壕吏，
遙望城頭紫氣星。往事莫追由世數，寬恩頻下為生靈。
而今頗覺農為重，說與村村父老聽。

端午

鬢符腰艾去紛紛，荷葉荷花匝水濱。思遠樓前雖有曲，
若邪溪畔豈無人。莫將楚恨悲兒女，聊把騷章託鬼神。
濁酒滿壺漁火笑，江邊鷗鷺正相親。

山園芍藥忽有花喜而賦

披草籬邊問舊花一番春事又萌芽非因老態逢時感
祇怨昏瞳作霧遮何處而今尋爛熳不圖於此見英華
翻階自合流芳詠可惜飄零野客家

夢故人郭推官元用詩以奠之

雞黍才陳淚已傾故人旌旆尚禪扃塵中愧我頭空白
夢裏逢君眼更青束髮論文真意氣傷心無語負幽冥
求銘敢後明儕事况復原頭有鶴鴒

夜聞鄰笛

幽夢初回漏未央起聞鄰笛倍淒涼不知何處石崖裂
忽送一聲江水長短棹清風懷赤壁斷垣斜月隱山陽
猶疑吹到梅花落不見梅花空攬腸

風雨終夜獨坐不寐

風雨瀟瀟到夜終夜寒一夜坐虛空何當樂與二三子
免使淒其六一翁老大自甘為老大窮通休苦較窮通
此心不作窺園想流水落花春夢中

田園秋興

草屋柴門風露涼寒瓜收蔓力鋤荒新栽茗蓬恰逢雨
欲翦芹藍猶待霜牧豎歸來煨芋熟田翁相就潑醅香
里胥偶報徵苗急自闢閒畦早築場

郊行有感

滿城風雨近重陽
梧竹蕭蕭欲斷腸
敢望白衣來送酒
擬將黃菊去為糧
繫萸安得山堪避
落帽豈無人在旁
千載風流心獨會
飲泉亦足慰淒涼

賦枸杞

神草如蓬世不知
壁間墻角自離離
辛盤空弔仙人杖
藥斧唯尋地骨皮
千歲未逢朱孺子
四時堪供陸天隨
霜晨忽訝春櫻熟
閒摘殷紅遶短籬

畫船

世路羊腸姑已之
扁舟我欲問冰夷
祇因吏部酷好酒
豈是雞林要售詩
萬事不如潮有信
寸心唯賴月相知
斜風細雨休歸去
此政老翁沉醉時

遊武夷九曲

紫縵紅栢事有根
綠函金鎖蛻猶存
無緣得到千巖頂
試問而今幾代孫
漢祀昔曾陳玉脯
晉人方始識桃源
不因人隱屏中老
未易抽簪扣洞門



國家圖書館, NATIONAL CENTRAL LIBRARY, TAIWAN, R.O.C.

卷五

心泉學詩稿卷六

五言絕句

寄石隱

閉門十日雨破屋砌生苔
此意何人會抱琴來不來
題葉寄楊芸夫

吟得秋風老敲窗意深憑將林下事為寄與知音

心泉二首

涓涓萬古意湛湛一塵無
明月來窺鏡宵寒露滴珠
驟來驚辟易久視益虛無
咫尺星堪摘波搖又走珠

菊泉

疏泉得古體種菊蒙秋潭願與村中人一瓢共清甘

聞泉

山椒一雨過石罅百泉鳴應接都不暇更兼秋月明

閭亭塵尾泉

泉揮玉塵尾岫擁翠雲裘盡日看不足倚欄生古愁

江橫信筆

潮汐有贏縮江橫無古今魚龍任掀舞孤月在天心

書滴翠巖壁

蘿衣濕寒翠苔錦上嶙峋一榻千峯裏因詩憶古人

書香爐瀑布圖後

飛流三百丈日射碧琉璃一氣何終極淋漓自不知

青霞西亭

長松被薜荔怪石生烟霞簷牙木杪見上有山人家

滄浪亭

曉色桃蒸霞春陰柳垂霧為問橋下船沿流到何處

心泉

泠泠一澗泉炯炯千樹雪歲寒鐵石心山中玩芳潔

讀可翁間坐偈

夜久風浪息驪龍弄頷珠水怪不敢動明月滿江湖

白髮

月照當襟雪終翦施摩詰我作白髮行而得養生術

題石

巖石多意氣松樹高枝齡倚枝眇雲濤天風吹泠泠

怡雲

把作一片畫晴陰渾不同不知誰是畫佇立意無窮

寒食有感

杏粥因懷舊榆羹豈為春憑將禁火事說與乞墻人

郊意

清晨起搔頭荷鋤出門去露濕野草花香來不知處

題畫竹扇寄友

明月二千里清風一萬竿相思寫不得寫出夢來看

春日聞禽戲題寓解

隔墻聽幽哢入坐春融融午夢恬不成始知身在籠

棹歌

鼓枻歸去來簑風鳴策策明月傾我壺滄浪天一碧

牧童歌十首

荷笠小蒼頭犢視乘水牛揚鞭自叱咤度隴復憑溝
軟坡便佇犢涼陰聚羣髻一豎忽然起恐牛殘豆苗
隔溪騎渡水浮去似鷓鴣莫詰五湖事且看牛背兒

卷六

倦來牛背卧一覺度前岡牛飽兒呼餒歸來煨芋香
前山飛暮雨牛上展青簑回首牛呼犢哀音兒唱歌
斜陽歸處險路熟了無疑結草為衣著園葭作竹吹
野花簪短笠露濕蔓青青莫笑兒童小人間河鼓星
老翁分杜酒七箸小孩提黃犢今堪駕明年學把犁
生來在田野少小學耕耨致望多名譽隨人角掛書
芳郊望無際逐草任西東世上千場夢人間一笛風

七言絕句

山中秋晚

命策空山風露冷野花無數不知名林叢深處無人問
時吐秋芳一樣清

書隱者壁

鷓啼花落春已非秧老蠶眠雨初霽牛衣夢覺春日高
風前猶是巢由是

飛泉

蘚壁輕飛霧雨寒一簾清漱玉珊珊遊鱗莫羨層瀾去
鏤雪雕冰滿肺肝

題贈枯崖

玉塵無心試出拈山房春靜燕歸簷相思獨上青霞頂
閒倚欄干望塔尖

贈老溪浮上人

玉澗雙盤略約過對人捫蝨坐雞窠
煮茶與客早歸去落日前山路更多

錫老弟山居

君住南山我北山隔溪斜照見炊烟
相尋懶趁溪邊路村酒時沽上釣船

閨意

聘得深村玉雪姿力勝杵臼紫齊眉
笑他老大專房寵猶把房幃比舊時

酒量減

少年一日幾鴟夷瓦甃而今力不支
莫笑杯中酒量減至今全在半醺時

題武夷

九曲諸峯向背殊丹青雖巧不能模
堂堂標致高如許靈迹何須問有無

重遊武夷偶成權歌一首

一派彎環九曲溪溪深溪淺靜無泥
鷺鷥不作窺魚計飛入屏風也似迷

月巖

皎皎應如月上弦為誰長掛此簷前
行人莫笑中空洞

空洞中間盡是天

青霞

百尺長松巖下風
一輪明月屋西東
夢回細數登山路
知在青霞第幾重

玉女峯

玉女攢空擁霧鬟
鏡心千古照溪灣
願分一滴清溪水
去洗人間脂粉顏

題西山靈峯感應寺

路入靈峯西復西
枕椰葉暗古招提
山僧更在雲深處
花落蒼苔幽鳥啼

題純陽洞

道士當年九日山
側身西望翠雲間
一枝乞倚純陽洞
萬仞崔嵬不可攀

次枯崖上人催梅韻

黃葉蕭蕭雨滴階
夢魂飛到瀑邊梅
遙知柳栗山中老
一日花間一百回

百花洲梅

孤根寧不在栽培
枝北枝南春一回
盡道游魚是佳讖
不知洲上有花魁

早梅

荷已全凋菊未殘一枝的皜照江干暖風莫詫攬先意
留取清芬待歲寒

瀑上見梅有懷老溪上人

野水橫斜最老枝一生心事雪霜知世人重眼不重鼻
祇愛花光與補之

雨中見梅泣然而作

夢遶孤山欲斷魂竹籬茅舍雨紛紛何心更作巡簷事
明月枝頭照淚痕

次韻

絕頂秋高風露寒倚欄心事到梅間誰知歲晚相思意

欲種梅花滿此山

贈林愚庵墨梅

色空已解花光意香影難隨逋老蹤此叟芒端不著蜜
幾回曾誤壁間蜂

題蕭照畫山水漁父四軸

裂石斷崖如赤壁暗想當年學士蘇巨口細鱗新網得
一樽唯有月相娛

輕簑短棹下滄浪不是尋常黃帽郎料應江上青山色
肯博人間白玉堂

火雲收盡天逾濶野艇歸來日未斜秋思滿江禁不得

又吹長笛出蘆花

野航偶繫梅花下
人在梅花與雪俱
真釣情知魚不食
一絲終日掛冰壺

又漁父四首

昨日賣魚到城郭
暑氣千門正炮烙
買酒歸來風露涼
始信人間漁父樂
釣得魚來日又斜
潮回無路可歸家
炙魚當飯且一飽
閒看白鷗飛浪花
海光瀲灩月團圓
一顆明珠落玉盤
鷗鷺不知何處宿
白頭閒坐把魚竿

青山淡淡水悠悠
有客江邊盃浪遊
漁父相逢欲借問
棹頭吟諫不相酬

七夕

盈盈一水望牽牛
欲渡銀河不自由
月照纖纖織素手
為君裁出翠雲裘

江上聞笛

笛聲何處水茫茫
潮落沙寒月照廊
嵇呂成塵不可覓
滿襟清淚憶山陽

春曉聞禽

喚回春夢幾聲禽
澗草巖花動此心
搔首偶然自失笑

不知何處是山林

聞雞

無數窮簷苦夜悠
一聲驚散枕邊愁
天家合把黃金鑄
置向竿頭赦九州

聞蟬

閉息含真把葉枯
春風將盡蛻寒膚
綠槐忽作仙人嘯
長曳一聲山日晡

賦竹聞禽

晴哢連林春翕翕
一片勞心不堪繫
竹間忽作么鳳吟
何處飛來羽衣濕

飯牛歌

新秧插遍水盈疇
童稚相呼去飯牛
極目平坡烟草細
歌聲何處雨颼颼

水碓

閒過枯崖
文室午因
假榻起聞
碓聲偶成

午枕相隨夢出塵
覺來不記是城闈
寂無人語惟聞碓
恐有穿腰持石人

詠狸

買魚月月與牲狸
持鼠有心奚待飢
但免翻盆與覆碗
何須要見血淋漓

詩餘

滿江紅 登樓 偶作

樓倚虛空覺人世不知何處人縹緲半簷星斗一窗風
露潮退沙平鳧雁靜夜深月黑魚龍怒把青樽狂自笑
餘生成何事 塵埃外談高趣烟波上題新句這美景
良宵且休虛度夢覺宦情甜似蠟老來况味酸如醋念
兒曹南北幾時歸情朝暮

賀新郎 贈鑠 笛

鐵笛穿花去問長安市上生涯而今何似破帽青衫塵
滿面不識何人共語且面壁聽風雨惟我虛中元識破
笑人間日月無停杼名與利莫輕許 人生窮達皆天
鑄試燈前為問靈龜觀君休恚心肯命通元有數何幸
知音記取季主也應留得住百歲光陰彈指過算伯夷
盜跖俱塵土心一寸人千古

漁父詞十三首

萬里長江一釣絲蕭蕭蓬鬢任風吹微雨過片帆歌青
山濃淡更多奇

江渚春風澹蕩時斜陽芳草鷓鴣飛蓴菜滑白魚肥浮
家泛宅不曾歸

烟浦迴環幾百灣無人知此極頭船風露冷月娟娟雲
間一過看飛仙

野纜閒移石筍江旁人爭看老眉厖鋪月席展風窗飛
來何處白鷗雙

葭荻橫披象木東浪花如雪晚來風雲母幌水晶宮蓮
花一葉白頭翁

飄忽狂風一霎間長魚吹浪勢如山牢繫纜蓼花灣白
鷗沙上伴人間

清曉朦朧古渡頭烟中人語鶻聲柔雲五色蜃成樓雞
鳴日出似羅浮

搔首推篷曉色新雪花飄瞥大江濱漁父醉不收緡白
髭紅頰玉為人

明月愁人夜未央蓬窗如畫水浪浪何處笛起淒涼梅

花噴作一天霜

白首漁郎不解愁長歌箕踞亦風流江上事寄蜉蝣靈
均那更恨悠悠

琉璃為地水晶天一葉漁舟浪滿顛風肅肅露娟娟家
在蘆花何處邊

江上浪花飛洒天拍階鞦韆屋如船月不夜水無邊何
處笛聲人未眠

遠入茫茫無盡邊漁舟來往似行天欹枕看不成眠誰
識人間太乙仙

又漁父詞二首 書玄真 詞塵

白水塘邊白鷺飛
龍湫山下鯽魚肥
歌雨笠著雲衣
玄真不見又空歸

巖下無心雲自飛
塘邊足雨水初肥
龜曳尾綠毛衣
荷盤無數爾安歸

欸乃詞 贈漁父 劉四

白頭翁白頭翁
江海為田魚作糧
相逢祇可喚劉四
不受人呼劉四郎